

刘宾客文集

一
五册

寄鈔墨
文鐫物
集寶印

三十卷

外集十

光緒
和朱氏刊
仁

劉賓客文集卷第一

正議大夫檢校禮部尚書兼太子賓客贈兵部尚書劉禹錫

賦

問大鈞賦

砥石賦

楚望賦

傷往賦

何卜賦

謫九年賦

望賦

山陽城賦

秋聲賦

問大鈞賦

并序

始余失臺郎爲刺史又貶州司馬俟罪朗州三見閏月
人咸謂數之極理當遷焉因作謫九年賦以自廣是歲
臘月詔追明年自闕下重領連山郡印綬人咸曰美惡
周必復第行無恤歲杪其復乎居三年不得調歲二月

有事于社前一日致齋孤居慮靜滯念歛起伊人理之
不可以曉也將質諸神乎謹貢誠馳精敢問大鈞其夕
有遇寤而次第其詞以爲賦

圓方相函兮浩其無垠宵冥翕闢兮走三辰以騰振孰
主張是兮有工其神迎隨不見兮強名之曰大鈞敲以
臨下兮巍兮雄尊天爲獨陽高不可問王居其中與人
差近身執其權心平其運循名想像斯可以訊曰嘻蒙
之未生其猶泥耳落乎埏埴唯鈞所指忽然爲人爲幸
大矣工賦其形七情與俱嗇智不授畀之以愚坦坦之
衢萬人所趨蒙一布武化爲畏途人或譽平之百說徒
虛人或排之半言有餘物壯則老乃唯其常否終則傾

亦不可長老先期而驟至兮否踰數而叵量雖一夫之
不獲兮亦大化之攸病謹薦誠上問兮俛伏以聽是夕
寢熟夢遊兮無何有之鄉抗陛級于重霄兮異人閒之
景光中有威神兮金甲而焯焯領之使前兮其音琅琅
曰吾大化之一工也居上臨下廉其不平汝今有辭吾
一以聽播形肖貌生類積億橐籥圈匡鎔鍊消息我之
司智初不爾嗇不守以愚覆爲汝賊旣賦汝形輔之聰
明盍求世師資適攸宜胡然抗志遐想前列倚梯青冥
舉足斯跌韜爾智斧無爲自伐鑿竅太繁天和乃洩利
逕前誘多逢覆轍名腸內煎外火非熱今哀汝窮將厚
汝愚剔去剛健納之柔濡塞前竅之傷痕兮招太和而

與居恕以待人兮急以自拘道存邃奧無示四隅軋物
之勢不作兮見傷之機自無汝不善用吾焉嗇乎且夫
貞而騰氣者膺膺健而垂精者昊昊我居其中猶輪是
蹈以不息爲體以日新爲道俛鱗蜚走灌莽苞阜乃牙
乃甲乃殪乃剖陽榮陰悴生濡死藁各乘氣化不以意
造賦大運兮無有淑慝彼多方兮自生醜好爾奚不德
余以驟壯姑尤我以速老邪觀汝百爲又或不然赤子
哇哇急其能言亦旣名物幾時蹢躅春耕其工投種之
日釋耒而歎何時實栗望所未至謂余舒舒欲其久留
謂我瞥如我一子二誰之曲歟彼蒹葭之蒼蒼兮霜霰
苦而中堅松竹之皴皴索擗兮不若櫛筍之可憐納材

葦而構明堂兮固容消而力完揚且之哲兮不可以常
然當錫爾以老成蒼眉皓髯山立時行去敵氣與矜色
兮噤危言以端誠俾人望之侮黷不生爾之所得孰與
壯多不善處老問余而何受教而回蘧蘧形開嚮之威
神孰爲來哉乃遽衣促盥端慮滌滌想委佩低簪持簿叩
顙而言曰楚臣天問不訓今臣過幸一獻三售始厚以
愚終期以壽忘上問之罪濯已然之咎心憎故術腹飽
新授馳神清（玄）拜手稽首

砥石賦

并序

時在朗州

南方氣泄而雨淫地慝而傷物媪神噫溼淪色壞味雖
金之堅亦失恆性始余有佩刀甚良至是澀不可拔剖

其室乃出遡陽眇眇傳刃蒙脊鱗然如疳痂如黑子如
青蠅之惡銳氣中錮猶人被病然客有聞焉裹密石以
遺予沃之草腴雜以烏膏切劓下上真質焯見躊躇四
顧迨奈周切爾謝客微子之貽幾喪吾寶客曰吾聞諸梅
福曰爵祿者天下之砥石也高皇帝所以礪世磨鈍有
是耶余退感其言作砥石賦

我有利金兮以利爲佩遭土卑而慝作兮雄鉞爲之潛
晦如景昏而蝕旣兮與肌漆而爲癘顧秋蓬之不可刺
兮尙可遊乎鼂髀之外利物蒙蔽材人惆悵俾百汰之
至精播一檢而多恙豈害氣之獨然兮將久不試而然
彼屠者之刃兮獵者之鋌不灌不淬兮揉錯銜鉛日鼓

月揮兮剗腴擊鮮睨燿燮以耀芒蒨淫夷而騰羶豈不
涉暑而蒙沴兮鼎用之而成妍有客自東遺余越砥圭
形石質蒼色膩理剗其鱗皴滑以滫瀡如衣澣垢如鼎
出否霧盡披天萍開見水拭寒燄以破眚擊清音而振
耳故態復還寶心再起旣賦形而終用一蒙垢焉何恥
感利鈍之有時兮寄雄心於瞪視嗟乎石以砥焉化鈍
爲利法以砥焉化愚爲智武王得之商俗以厚高帝得
之傑材以湊得旣有自失豈無因漢氏以還三光景分
隨道闊狹用之得人五百餘年唐風始振懸此天砥以
礪兆民播生在天成器在君天爲物天君爲人天安有
孰礪世之具而患乎無賢歟

楚望賦 并序

予既謫于武陵其地故郢之裔邑與夜郎諸夷錯雜繫
乎天者陰伏陽驕是已繫乎人者風巫氣竄是已囂
浮浮利于樓居城之麗譙實鄰所舍四垂無蔽萬景全
入因道其遠邇所得爲楚望賦云

翼軫之野祝融司方陰迫而專專實生沴天濡而累土
洩而泥氣罕淑清兮淫氛曠曠中人支體兮爲瘥爲瘵
以廣滌煩兮利居高于物外我卜我居于城之隅宛在
藩落麗譙渠渠四阿垂空洞戶發樞眸子不運坐陵虛
無歲更周流時極慘舒萬象起滅森來貺予櫺軒之外
羣山龍嵒岡陵靡阤勢若相拱出雲見怪竊蔚森聳露

夕霞朝望如飛動簷廡之下大江傾洞支流合輸泄入
雲夢羲和望舒出沒兩涯涵泳之族聳牙歔呀秋水灌
盈漩石飄沙流枿軒昂舞于盤渦逮及收潦澹如醪醕
白石磷磷倒影羅生蘋末風起有文無聲悠遠煙緜與
空蒼然湘沅之春先令而行臘月寒盡溫風發榮土膏
如濡言鳥嚶嚶三星嘒其晚中植物颯以飄英雲歸高
唐草蔽洞庭日與天盡神將化并圓方相涵遊氣杳冥
熙熙藹藹藻飾羣形枿樹童立積空凝青環洲曲塘含
景曜明恢台之氣發于春季涉夏如鑠逮秋愈熾土山
焦熬止水漢沸翔禽跼墮呀咻垂翅曦赫歆蒸陽極反
陰二儀交精下上相歆雲興天際欬若車蓋凝矚未瞬

瀰漫靄靄驚雷出火喬木糜碎殷地熱空萬夫皆廢懸
雷綆縋日中見昧移晷而收野無完塊少陰之中景物
澌鮮丹葉星房燭耀川原夕月旣望曜于丹泉上鏡下
冰湔塵濯煙宿麗潛芒獨行高躔皓一氣之悠然潔有
形而溢清⑤杳微明而斐亶想遊目於化先夜無朕以
徂征金霞暈乎海壖明星方揚斜漢西懸璿柄如墮半
沈層瀾雞啁晰而晨鳴兮日荏苒以騰晶動植瞭兮已
分山川鬱乎不平復人寰之喧卑洵浩浩以營營追向
時之景光不可驟得以再更意華胥之夢還獨仿像而
馳精日次于房天未降霜百卉猶澤水泉收脈故道股
音削衍爲廣斥水禽嬉戲引吭伸翮紛驚鳴而決起捨
宣

綵翠于沙礫時時北風振槁揚埃蕭條邊聲與雁俱來
寒氛委積萬竅交激楚雲改容飛雨凝滴灑林遞響淅
瀝梢檄飛電照雪以騰光柔蔬傲霜而秀坼躔次殊氣
川谷異宜民生其閒俗鬼言夷招三閭以成謠德伏波
而構祠投粬粒反尼呂以鼓棹豢鱸魴而如犧蟠木靚深

孽祆憑之祈年祛癘蠲敬祇威擊鼓肆筵河旁水湄薦

誠致祝卻略躡踞

躡踞見靈光賦

渚居鱸食大掩水物罟

張餌啗不可遁伏顯舉潛縋晝撞夜觸設機沈深如拾

于陸彼遊儵之瑣類咸跳脫於窘束雖三趾與六眸時

或加乎一目亦有輕舟軒輊泛浮柁綸往復馴鷗相逐

暮夜澌寂嘯歌羣族僮音俚態幽怨委曲逗疏析於江

城引哀猿於山木巢山之徒梓木開田灼龜伺澤兆食
而燔鬱攸起于巖阿騰絳氣而蔽天熏歇雨濡穎垂林
巔盜天和而藉地勢諒無勞而有年罷士閑人逸爲末
作求金渚涖淘汰瀾潏流注瀆沱繁光熠燿貪賈來貿
發於懷握無翼而飛潤于豐屋哂耕耘之悒悒徒胼胝
以自鞠我處層軒日星回還閱天數而視民風百態變
見乎其閒非耳剽以臆說兮固幽永而縱觀觀物之餘
遂觀我生何廣覆與厚載豈有形而無情高莫高兮九
閶遠莫遠兮故園舟有楫兮車有轄江山坐兮不可越
吾又安知其所如悅臨高以觀物

傷往賦

并序

人之所以取貴於飛走者情也而誕者以遣情爲智豈至言耶予授室九年而鰥痛若人之天闕弗遂也作賦以傷之冀夫覽者有以增伉儷之重云

歎獨處之悵悵兮憤伊人之我遺情可殺而猶毒境當歡而復悲人或朝歎而暮息夫何越月而逾時太極運乎三辰轉寒暑而下馳有歸於無兮盛復于衰猶昧爽之必暮又安得而怨咨我今怨夫若人兮曾旭旦而潛暉飄零日及之萼

日及僅也朝生暮落一名王蒸爾雅

倏忽蜉蝣之衣川

走下而不還露迎暘而易晞恩已甚兮難絕見無期兮永思我行其野農民桑者舉桉來饁亦在林下我觀于途裨販之夫同荷均挈荆釵布襦羽毛之蕃鱗介之微

和鳴灌叢雙泳漣漪薨薨伊蟲蠢蠢伊豸遊空穴深兩
兩相比何動類之萬殊必雄雌而與俱物莫失儷以孤
處我方踽踽而焉如我復虛室目淒涼兮心伊鬱心伊
鬱兮將語誰坐匡牀兮撫嬰兒何所勾沐兮何從仰飴
襦袴在身兮昔圍差跌輦囊附臂兮餘馥葳蕤誠天性
之潛感顧童心兮如疑曉然有難繼之慕漠然減好弄
之姿指遺桂兮能認遡空帷兮欲歸我入寢宮痛人亡
兮物改其容寶瑟僵兮弦柱絕瑤臺傾兮鏡匱空寒鑪
委灰虛幌多風隙駟晨轉窗蟾夜通步搖昏兮網黏翡
翠芳褥掩兮塵化蛩蛩閱刀尺之餘澤見巾箱之故封
玩服儼兮猶具繁華謝兮焉從想翩躚於是非求僊宰